



*K*hutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

30 Juin 2017

(05 Shawwal 1438 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « Vine pour Allah »:

Alhamdulillah - par la grâce d'Allah - nous fine passe ene très bon mois de Ramadhan et tous séki nous fine réussi faire dans sa mois là, li bizin ene continuation de bane les autres onze mois ki pé vini devant nous, *Insha-Allah*. Si nous fine réussi mette en pratique séki nous fine pratiqué dans le mois de Ramadhan, bé nous bizin dire *Alhamdulillah Summa Alhamdulillah* ki le Ramadhan fine amène beaucoup de bénéfices spirituellement pour nous. Sa bane bénéfices là fine touche nous lécorps physique et nous l'âme aussi et sa fine aide nous pour mette bane commandements d'Allah en pratique avec beaucoup de zéffore. Et aussi nous fine demande aide avec Allah (swt) pour ki nous capave mette So bane instructions divine en pratique malgré bane faiblesse ki nous ena.

Astaire, si dans ene mois ou fine fer tous sa zéffore là, bé c'est avec l'aide d'Allah ki ou fine réussi fer sa, et ou fine faire tous sa là pour ki Allah (swt) content avec ou, pardonne ou, et même ki ou gagne Allah (swt) même comme le plus grand récompense. Ramadhan fine quitte nous (à Maurice et bane pays dans le monde entier) et aller après 29 ou 30 jours de l'entraînement spirituelle ki nous fine gagner pour ki les onze mois ki devant nous, nous pas néglige nous de bane *Néki* (bon actions).

Si ou pas fer attention, alor ou capave perdi tous et même perdi Allah (swt) et ou ré-alle gagne Shaytan comme ou camarade intime. Ki bénéfice alor sa Ramadhan là fine apporté pour nous tous alors? Tant de sacrifices dans sa mois béni là, mais kan li aller, nous bane bon actions ki nous ti faire pendant sa mois béni là aussi alle ensam avec li et nous ré-vine dans nous la vie ki pas Islamique ditout, ré-vine couma avant? Lerlà même ki Ramadhan ki ou fine observer dans tous so l'aspects pour gagne le plaisir d'Allah et Allah même comme récompense, li alle dans vide. Et couma Allah (swt) même dire dans le Quran Shareef, ki par ou propre action même ou fine amène ou-même dans la perte. Ou fine plito attire la colère d'Allah lor ou, kot ou l'attachement avec bane attractions de sa la terre là risse ou dépi bane chemins de *Néki* et amène ou vers chemin de la punition divine, c'est-à-dire, ou pas fine réussi capave faire *Jihad* avec Shaytan et ni ou fine capave faire ou Shaytan gagne ene grand défaite et faire li converti en croyant sincère et vine musulman.

Si après Ramadhan nous ré-vine dans nous bane vié vices lérui là, en d'autres mots, sa veut dire, nous pas fine profite Ramadhan dans le mois de Ramadhan. Donc, ou fine perdi sa valeur récompense ki pendant Ramadhan ou ti être récompensé auprès d'Allah (swt). Ene croyant sincère ki content so Allah beaucoup même li bizin conné sa, ki sak bonne action ena ene récompense ki la loi divine même fine promette. Et récompense-là li pas ene récompense simple. Valeur ene récompense li mesure en fonction de celui ki accorde sa récompense là. Cadeau ene simple dimoune et ene lé roi ena so différence ki pas nécessaire dire ici. Allah Ta'ala le Créateur Suprême, So récompense li inégalable, inestimable et incomparable. Eski ena kit mesure ki capave mesure li? Définitivement non. Séki fine dire nous c'est necque pour donne nous ene l'idée, sinon c'est ene kitchose apart et au-delà de nous compréhension et imagination. Séki nous fine vive pendant le mois de Ramadhan, li pas même égal à sa récompense ki Allah (swt) récompense nous là mais seulement li meilleur ki sa le monde là et tout saki li contenir.

La terre dans *duniya* (sa le monde là) nous acheté li par perche. Ena place acheté li par toise couma ena place li vendé ou loué par mètre carré. Sa dépanne région ki ou oulé acheté. Dimoune ki dans le domaine, zot conne très bien so valeur (c'est-à-dire, valeur terrain là et so région). Ene dimoune capave fer dettes lors dettes pour acheter 1 terrain dans ene bon région et pour construire, li accepter fer encore de dettes - loan lor loan avec so l'intérêt et pendant pliss ki 10 ans li vine ene esclave avec loan ki li fine prend et so remboursement maintenant li doublé ou même triplé de sa loan ki li fine prend là et sa fatigue li. Li pas ena "*peace of mind*" - la paix et sommeil pas gagner, tracas lor tracas pour ena, et tout sa pour bane zaffaires temporaire ki demain bizin quitte tous sa là, là-même, et ou pas pour amène sa avec ou et ou si pas réussi paye loan là avec so l'intérêt

ena saizi (sale by levy ou sois sale by licitation) pour paye séki ou pas pé capave payé là; ou ene dimoune ou fini dans ou la vie.

Par contre ici, sa trésor spirituel ki ou gagner là, ou gagne le Créateur même comme récompense. C'est Li ki fine crée ou, fine créer sa l'univers là, et tous séki l'univers posséder appartenir à Li. Et pour gagne Li, nek ou ena pour suivre séki Li fine dire ou faire et pas faire séki Li fine dire ou pas faire, et accepter So message ki Li envoyer à travers So messenger choisi. Péna aucaine dette lor ou la tête, péna aucaine loan avec so l'intérêt lor ou la tête, et sa récompense ki ou gagner avec Li, ou pou trouve li dans sa le monde là et dans l'au-delà encore plisse. Et kan ou suive So bane commandements divine, ou gagne la paix et la tranquillité d'esprit. Ou dormi bien sans aucaine tracas et kan ou quitte sa le monde temporaire là, ou quitte li avec contentement. Ki faire? Parski péna aucaine réproche dans ou. Ou fine faire saki ou Créateur fine dire ou faire et ou pé content pour alle zoine ou Créateur. Et bien définitivement, ou pou gagne encore bane grand récompense ki Li fine réserver pour ou. Ou pou quitte sa le monde ici-bas là avec ene contentement parski ou fine sème la grain de bane bon actions ki so récolte pé attane ou dans ene lémonde permanent ki so fruit pour doux. Ou fine content ou Créateur tanque ou ti vivant lor la terre. Ou fine faire séki bon pour ki ou Créateur aussi content avec ou.

Donc, faudé pas nous alle tombe dans piège de Shaytan après ene telle mois de bane bonnes action kot *Sunnat* so récompense couma *Faraz* et *Faraz* so récompense énorme. Sa récompense là pou tellement énorme ki nous même nous pas ti attane, mais selman Allah, nous Créateur fine donne nous sa et fine pardonne nous aussi pour tous nous bane péchés ki nous fine commette. Et c'est ene mois kot fine donne nous l'occasion pour prend ene bain spirituel dans sak moment ki nous fine gagner. Nous fine gagne sa bonheur là pour purifier nous et aussi faire ene bon servicing pour nous lé corps, c'est-à-dire, sa deux là marche ensam, bain spirituel et ene bon servicing pour nous lécorps kot tire tous bane excès, tous bane impuretés ki ti contenir dans sa le corps là aussi et l'autre côté, nous l'âme vine pur comme-ci dirai, ene bébé ki fek prend naissance, kot li pure de bane péchés et lécorps pure de bane kitchoses toxiques ou bane excès de sucre, graisse etc.

Réfléchi impé, pour sa le monde là, ou fer tout pour tout pou gagne séki ou envie de sa le monde là, même si ena pour faire dette lor dette et paye l'intérêt lor l'intérêt kan li concerne ene kitchose temporaire. Saki permanent ou pas pé casse la tête avec sa. Couma eski ene dimoune capave mette de coté sa récompense immense là ki Allah (swt) fine promette là et li intéressé avec ene l'autre kitchose mondaine? Sa li couma dire, jette l'or ou diamant pour ramasse roche! Li pas paraite travail ene dimoune ki so l'esprit bon. Li bizin ene dimoune ki pas conne valeur de saki li pé jetté là!

Donc, ene dimoune ki attacher plisse avec sa lémonde temporaire là et li délaisse *Aakhérat* li bizin être ene imbécile ou bien ene dimoune ki péna croyance ki bizin ena lor promesse Allah (swt). Li manque *Yaqaen* (conviction ferme) ki bizin ena lor bane récompense ki Allah (swt) fine promette pour sak action. Quant à bane ki vraiment *Deendaar*, zamais zot pou disposé pou pran récompense matériel et temporaire en échange de zot bane *Ibaadat*. Pour zot, zot vise saki éternelle, zot vise pour gagne Allah même comme récompense. Et définitivement, même parmi bane croyants, sakaine ena so grade devant Allah. Celui ki Allah amène li pli près avec Li, celui là même so grade et statut dans lizié d'Allah pou pli grand. Sa pas veut dire ki Allah pas content So bane les autres serviteurs croyants. Li content zot et donne zot, zot récompense d'après zot degré la foi et zot bane bons l'intention et bonnes actions. Quant à bane Serviteurs Choisi, surtout bane Messagers d'Allah, zot, zot grade encore pli grand devant lizié d'Allah, parski Allah fine créer zot d'ene l'essence divine spéciale pou fer So travail spéciale lor la terre, et définitivement zot grade li dépasse grade de tous les reste de bane croyants lor la terre.

Alor, bane croyants, zot bane dimoune ki conscient et confiant et croire sincèrement et fermement ki récompense Allah (swt) li dépasse *duniya* et tout saki *duniya* contenir. Li capave paraite exagéré pour bane ki pas conné mais li ene fait et ene réalité indéniable pour bane *Imaandaar*. Et zot soumette zot tous les temps à la volonté d'Allah et zot trouve zot tranquillité d'esprit dans Allah et zot place zot confiance en Li seul pour tous zot bane z'affaires.

Ki Allah préserve l'*Ummah* de nous bien-aimé prophète Muhammad (saws) contre tous bane l'attaques de Shaytan, ki li dans nous-mêmes ou bane l'attaques ki vine de l'extérieur. Par la grâce d'Allah, Allah fine envoye So Khalifatullah parmi zot pou bénéficier de so bane conseils et pou suivre bane l'ordres divines. Ki Allah ouvert zot lécaire à bane vrais l'enseignements de l'Islam et ki zot vine bane vrai Musulmans, pas lor la lèvres seulement, mais en pratique, et avec ene lécoeur sincère. *Insha-Allah, Ameen.*